

Program My STEM Ambassador UMS titip kesedaran pemuliharaan alam semula jadi

Oleh Yap Siong Han

UB 29.09.2021 P. 05

SELARAS peranan memasyarakatkan ilmu, Persatuan My STEM Ambassador Universiti Malaysia Sabah (UMS) menganjurkan forum bertemakan alam semula jadi bersempena sambutan Bulan Sains, Teknologi, Kejuruteraan dan Matematik (STEM) Kebangsaan 2021.

Forum bertajuk 'Ways to Preserve Nature' dianjurkan dengan kerjasama U-Science serta Institut Biologi Tropika dan Pemuliharaan UMS bertujuan memupuk pengetahuan dan kesedaran tentang kepentingan memelihara serta memulihara alam semula jadi.

Program yang disiarkan secara langsung melalui Facebook dan YouTube My STEM Ambassador UMS itu disampaikan oleh Kurator Kanan IBTP, Patherine Iimbau.



MENJELASKAN: Patherine ketika berkongsi paparan pembentangan bersama peserta program.

Menurut Patherine, pelbagai kaedah pemuliharaan boleh dijalankan bermula di kawasan kediaman masing-masing sebagai langkah awal untuk memupuk kesedaran dalam kalangan golongan muda.

"Penjagaan ini boleh bermula dari rumah melalui aktiviti seperti kitar semula

bahan-bahan buangan domestik, kaedah kompos bahan buangan organik, penggunaan semula bahan terbuang dan penggunaan air secara berhemah.

"Saya percaya adik-adik sudah mula menjaga alam sekitar dengan membuang sampah di tempat yang betul. Ini sangat mudah untuk dilaksanakan.

"Jika semua orang mampu membuang sampah di tempat yang betul, pasti generasi muda hari ini akan dapat manfaat yang lebih baik dan dapat mengurangkan jumlah sampah di sekeliling kita," katanya.

Patherine berkata, aktiviti menanam pokok juga mampu memelihara alam semula

jadi dan memberikan terapi kepada orang ramai yang mungkin mengalami tekanan pada musim pandemik ini.

"Selain membekalkan oksigen kepada manusia dan haiwan, aktiviti menanam pokok juga dapat mengelakkan daripada terjadinya hakisan tanah, mengimbangkan suhu alam dan sebagai penampungan angin yang baik," katanya.

Pada perkongsian tersebut, Patherine turut menjemput orang awam untuk mengunjungi Galeri BORNEENSIS di IBTP UMS yang merupakan sebuah galeri pameran berkaitan keunikan spesies flora dan fauna di Sabah.

"Melalui Program Rakan Borneensis, peserta berpeluang untuk mendekati dan mencintai alam semula jadi melalui aktiviti seperti bird-watching, jungle trekking, pembuatan specimen serangga, pembuatan herbarium serta perkemahan selama dua hari di UMS," jelasnya.